



## OPĆINSKO VIJEĆE

Na osnovu člana 7. Stav 2 Zakona o budžetima u Federaciji BiH ("Službene novine F BiH", broj : 102/13,9/14, 13/14, 8/15, 91/15 i 102/15 ) a u vezi sa članom 15. i 17. Zakona o principima lokalne samouprave u Federaciji BiH ("Službene novine F BiH", broj 49/06) i čl. 94 – 95 Statuta Općine Foča ("Službene novine Bosansko – podrinjskog kantona Goražde", br.8/08, 11/08 i 16/13), Općinsko vijeće Općine Foča na 3.redovnoj sjednici, održanoj dana 24.03.2017. godine, d o n o s i

### **ODLUKU** **o izvršavanju budžeta** Općine Foča za 2017.godinu

#### **I – OPĆE ODREDBE**

##### **Član 1.**

Utvrđuje se način izvršavanja Budžeta Općine Foča za 2017.godinu u iznosu:

UKUPNO PLANIRANI PRIHODI.....	1.911.200 KM
UKUPNO PLANIRANI RASHODI.....	1.911.200 KM

##### **Član 2.**

Ovom odlukom uređuje se struktura prihoda i primitaka, rashoda i izdataka i izvršavanje Budžeta Općine Foča, prioriteta plaćanja, upravljanje dugom, te finansijskom i nefinansijskom imovinom, prava i obaveze korisnika budžetskih sredstava, ovlaštenja Općinskog načelnika, kazne za neispunjavanje obaveza kao i druga pitanja izvršavanja Budžeta za tekuću godinu.

##### **Član 3.**

Budžet je akt kojim se planiraju prihodi i primici, te rashodi i izdaci Općine za period od jedne fiskalne godine.

Budžet donosi Općinsko vijeće.

Budžet se odnosi na fiskalnu 2017.godinu, koja počinje 01. januara a završava 31. decembra 2017.godine.

Izrada i donošenje budžeta se zasniva na principima jedinstva, tačnosti, uravnoteženosti i zakonitosti budžeta, principu jedne godine, principu univerzalnosti, efikasnosti, ekonomičnosti, transparentosti i participativnosti.

#### **II STRUKTURA PRIHODA I PRIMITAKA TE RASHODA I IZDATAKA**

##### **Član 4.**

Budžet se sastoji od računa prihoda i rashoda.

U računu prihoda prikazani su prihodi od poreza, neporezni prihodi, potpore i grantovi, dok se računi rashoda sastoje od tekućih izdataka, grantova, kapitalnih izdataka i tekuće rezerve.

#### **Član 5.**

Svi javni prihodi i primici Budžeta, uključujući i prihode koje korisnici budžeta ostvaruju obavljanjem osnovne djelatnosti po posebnim propisima uplaćuju se na račun javnih prihoda budžeta Općine i iskazuju po izvorima iz kojih potiču.

#### **Član 6.**

Budžetsko računovodstvo se zasniva na računovodstvenim načelima: tačnosti, istinitosti, pouzdanosti, sveobuhvatnosti, pravovremenosti i pojedinačnom iskazivanju poslovnih događaja, te međunarodnim računovodstvenim standardima za javni sektor.

Budžetsko računovodstvo vodi se po načelu dvojnog knjigovodstva i na računima kontnog plana budžeta.

#### **Član 7.**

Priznavanje prihoda i primitaka, te rashoda i izdataka putem sistema glavne knjige provodi se po načelu modificiranog nastanka događaja.

Prihodi i primici priznaju se u onom periodu kad su mjerljivi i raspoloživi, tj. kad su uplaćeni na račun budžeta.

Rashodi i izdaci priznaju se u onom period kada je nastala obaveza plaćanja.

## **II - IZVRŠAVANJE BUDŽETA**

#### **Član 8.**

Sredstva Budžeta koriste se za finansiranje poslova, funkcija i programa Općine, kao i drugih korisnika Budžeta u visini koja je neophodna za njihovo obavljanje i izvršavanje.

Budžetska sredstva će se koristiti srazmjerno prilivu sredstava po svim kodovima.

#### **Član 9.**

Korisnici koriste budžetska sredstva samo za namjene koje su određene Budžetom i to do visine utvrđene u njegovom posebnom dijelu.

Naredbodavac po izvršavanju Budžeta je Općinski načelnik.

#### **Član 10.**

Budžet se izvršava u skladu sa njegovim likvidnim mogućnostima po sljedećim prioritetima:

1. Materijalni i drugi troškovi neophodni za rad općinskih službi
2. Plaće, naknade zaposlenih i naknade Općinskim vijećnicima
3. Naknade za rad u radnim tijelima, komisijama i po osnovu drugih samostalnih djelatnosti i povremenog samostalnog rada
4. Subvencije javnim preduzećima
5. Kapitalni izdaci
6. Ostalo

#### **Član 11.**

Namjenski prihodi i primici koji nisu iskorišteni u prethodnoj godini prenose se u budžet za tekuću godinu.

Namjenske donacije i transferi koji nisu planirani ili su planirani u iznosu manjem od ostvarenog, a ostvare se u toku 2017. godine, namjenski će biti utrošeni odlukom Načelnika.

Sredstva iz prethodnog stava naknadno će biti uvrštena u Budžet Općine Foča za 2017. godinu, Odlukom o izmjenama i dopunama Budžeta Općine Foča za 2017. godinu, koju donosi Općinsko vijeće.

#### **Član 12.**

Hitni i nepredviđeni izdaci koji nisu planirani u Budžetu ili su planirani u nedovoljnom iznosu podmiruju se iz sredstava tekuće rezerve utvrđene u Budžetu.

O korištenju sredstava tekuće rezerve na osnovu zahtjeva odlučuje Općinski načelnik.

Služba za privredu, finansije, opću upravu, društvene djelatnosti i BIZ obavezna je tromjesečno izvještavati Općinskog načelnika o korištenju sredstava budžetske rezerve.

Općinski načelnik polugodišnje izvještava Općinsko vijeće o korištenju sredstava tekuće rezerve iz stave 1. ovog člana.

### **Član 13.**

Ako se tokom godine, na osnovu zakona ili drugih propisa umanju nadležnost korisnika što zahtjeva smanjenje sredstava ili se korisnik ukine, neutrošena sredstva za njegove troškove prenose se u tekuću rezervu budžeta ili na korisnika koji preuzme njegove poslove.

### **Član 14.**

Ako se u toku budžetske godine zbog nastanka novih obaveza za budžet ili promjena privrednih kretanja povećaju rashodi i /ili izdaci, odnosno smanje prihodi i/ili primici budžeta Općinski Načelnik može na prijedlog Službe za privredu, finansije, opću upravu, društvene djelatnosti i BIZ, donijeti odluku o obustavljanju izvršavanje pojedinih rashoda i /ili izdataka u trajanju od 45 dana.

Mjerama privremenog obustavljanja izvršavanja, Općinski Načelnik može:

1. Zaustaviti preuzimanje obaveza i/ili
2. Predložiti produženje ugovorenih rokova plaćanja i/ili
3. Zaustaviti preraspodjelu budžetskih sredstava potrebnu radi preuzimanja obaveza.

Izuzetno, uz mjere iz stava 2. ovog člana Načelnik Općine može donijeti odluku da budžetski korisnici mogu sklapati ugovore o nabavci roba i usluga, uz prethodnu suglasnost Službe za privredu, finansije, opću upravu, društvene djelatnosti i BIZ.

### **Član 15.**

Ako se za vrijeme provođenja mjera privremene obustave izvršavanja budžeta, budžet ne može uravnotežiti, ili se u toku godine povećaju prihodi i/ili primici, vrše se izmjene i dopune budžeta.

Općinski Načelnik mora u roku od 15 dana prije isteka roka za privremenu obustavu izvršavanja budžeta predložiti Općinskom vijeću izmjene i dopune budžeta.

Izmjene i dopune budžeta vrše se po istom postupku koji se primjenjuje kod donošenja budžeta.

U toku postupka izmjena i dopuna budžeta Općinski Načelnik može na prijedlog Službe za privredu, finansije, opću upravu, društvene djelatnosti i BIZ produžiti privremenu obustavu izvršavanja pojedinih izdataka.

Izmjenama i dopunama budžeta ponovo se uravnotežuju prihodi i primici, odnosno rashodi i izdaci budžeta.

### **Član 16.**

Preraspodjela sredstava na budžetskim stavkama na zahtjev budžetskog korisnika može se izvršiti najviše do 10% ukupno odobrenih rashoda i izdataka za tog budžetskog korisnika na osnovu rješenja Službe za privredu, finansije, opću upravu, društvene djelatnosti i BIZ.

Izuzetno, u okviru odobrenog Budžeta preraspodjela sredstava je dozvoljena između budžetskih korisnika.

O preraspodjeli iz prethodnog stava odlučuje Općinski načelnik na prijedlog Službe za finansije.

### **Član 17.**

Pogrešno ili više uplaćeni javni prihodi vraćaju se uplatiocima iz tekućeg priliva uplatnog računa na koji su isti pogrešno ili više uplaćeni a u skladu sa Pravilnikom o procedurama za povrat više ili pogešno uplaćenih javnih prihoda sa jedinstvenog računa trezora F BiH („Službene novine F BiH“ broj 47/04)

#### **Član 18.**

Sredstva utvrđena za isplatu plaća i naknada za uposlene u Općini Foča biće utrošena u skladu sa Pravilnikom o plaćama i drugim primanjima državnih službenika i namještenika zaposlenih u organu uprave Foča.

#### **Član 19.**

Sredstva predviđena za dnevnice za službena putovanja u zemlji i inostranstvu biće utrošena na osnovu Pravilnika o naknadama troškova za službena putovanja Općine Foča.

#### **Član 20.**

Postupak nabavke roba, usluga i radova obavezno se vrši u skladu sa Zakonom o javnim nabavkama Bosne i Hercegovini („Službeni glasnik BiH“ broj 39/14).

#### **Član 21.**

Sredstva utvrđena za isplatu naknada za rad u Općinskom vijeću i radnim tijelima Općinskog vijeća isplaćuje se na osnovu odluke koju donosi Općinsko vijeće.

#### **Član 22.**

Sredstva utvrđena na ekonomskim pozicijama:

- 614411-1 Subvencija JKP“Ušće“
- 614411-2 Subvencija Domu zdravlja Ustikolina
- 614411-3 Subvencija JU Obdanište

realizuju se kao tekući transferi za pomoć u radu nevedenih ustanova i preduzeća, a na osnovu odluke Općinskog načelnika.

#### **Član 23.**

Sredstva planirana u Budžetu Općine Foča utvrđena na pozicijama

- Transferi mjesnim zajednicama
- Transfer za sport
- Transfer za kulturu

realizuju se kao tekući transferi za pomoć u njihovom radu, a na osnovu odluke Općinskog načelnika.

#### **Član 24.**

Sredstva utvrđena na ekonomskim pozicijama:

- 614311 Tekući transferi neprofitnim organizacijama
- 614414 Subvencije poljoprivrednoj proizvodnji

realizuju se po javnom pozivu, a na osnovu odluke Općinskog načelnika.

#### **Član 25.**

Sredstva utvrđena na ekonomskim poziciji 614329-1 Obilježavanje manifestacije „Ustikoljansko ljeto“ realizuju se u skladu sa programom obilježavanja manifestacije koji donosi organizacioni odbor , a na osnovu odluke Općinskog načelnika.

#### **Član 26.**

Sredstva utvrđena u budžetu Općine Foča na pozicijama:

1. Grantovi pojedincima - Izdaci za invalide, ranjene borce i porodice poginulih boraca
2. Grantovi pojedincima – Izdaci za raseljena lica
3. Isplata stipendija
4. Transver udruženjima građana i neprofitnim organizacijama

koriste se na osnovu odluka i programa raspodjele sredstava za svaku poziciju usvojenih od strane Općinskog načelnika, a na prijedlog nadležne službe u skladu sa utvrđenim kriterijama.

### **III – NADZOR I FINANSIJSKO IZVJEŠTAVANJE**

#### **Član 27.**

Nadzor nad finansijskim, materijalnim i računovodstvenim poslovanjem budžetskog korisnika, te nad zakonitošću i svrsishodnom upotrebom budžetskih sredstava vrši Općinski načelnik.

#### **Član 28.**

Služba za privredu, komunalne poslove, društvene djelatnosti, opću upravu i finansije dužna je podnositi Općinskom vijeću i kantonalnom ministarstvu finansija kvartalne izvještaje za periode od: 01.januara do 31. Marta, od 01.januara do 30. juna i od 01.januara do 30.septembra u roku od 20 dana po isteku obračunskog perioda, a za period od 01.januara do 31.decembra do 5.marta tekuće godine.

#### **Član 29.**

Služba za privredu, finansije, opću upravu, društvene djelatnosti i BIZ. obavezna je dostaviti godišnji izvještaj o izvršenju budžeta kantonalnom ministarstvu finansija do 5.marta tekuće godine za prethodnu godinu.

Služba za privredu, finansije, opću upravu, društvene djelatnosti i BIZ. obavezna je dostaviti godišnji izvještaj o izvršenju budžeta općinskom vijeću do 31.marta tekuće godine za prethodnu godinu.

### **IV- KAZNENE ODREDBE**

#### **Član 30.**

Odgovorno lice budžetskog korisnika nosilac izvršne vlasti Općine nadležan za budžet, kao i drugo lice odgovorno za Budžet kaznit će se za prekršaj koji napravi u skladu sa članom 102. i 103. Zakona o budžetima Federacije Bosne i Hercegovine („Službene novine Federacije BiH“, broj:102/13, 9/14, 13/14, 8/15, 91/15 i 102/15).

### **V -ZAVRŠNE ODREDBE**

#### **Član 31.**

Na sva pitanja koja nisu regulisana ovom Odlukom, a tiču se načina izrade, donošenja, izvršavanja Budžeta, zaduživanja, duga, računovodstva, nadzora i revizije Budžeta i dr., primjenjivati će se odredbe važećih Zakona.

#### **Član 32.**

Ova odluka stupa na snagu danom donošenja, naknadno će biti objavljena u službenim novinama Bosansko-podrinjskog kantona Goražde i primjenjivati će se za fiskalnu 2017.godinu.

**Broj:** \_\_\_\_\_/17  
**Datum:** \_\_\_\_\_ 2017. god.

**M.P.**

**Predsjedavajući  
Općinskog vijeća  
Muhidin Raščić**